

Daegsanh ngoenzneix angq baenzmaz, neix dwg aenvih miz song boux baengzyoux daj gizgyae daeuj yawj de, lij naeuz haemh neix cingj de okbae guhdoih gwn caeuz ciengq go dem.

Daegvaz caeueq Daegfuz song boux baengzyoux ndei neix 10 lai bi mbouj lienzhaeh lo, danhseih dingqnyi naeuz songde lij seizseiz gvaqniemh de, cungj vunz neix caen nanz ra ha. Vihneix, Daegsanh ndawsim gikdoengh dangqmaz.

Miz vah naeuz: “Gyoengq baengzyoux laeujnoh fatcaiz couh mbouj doxra, miz nanh seiz cij daeuj doxcet.” Daegsanh mbouj doengzeiq coenz vah neix. Vihneix, mehyah ciengzseiz caeueq de euqgengz euqvang, naeuz: “Mwngz bae caeueq songde doxraen doxraen hix ndaej, mboujgvaq, ceiq ndei lai dawz di cienz he youq gwnzndang, mboujnex, goulau daengz seizhaenx mwngz deng laepda gwn nengznyaen—mbouj ndwnj mbouj ndaej.”

Daegsanh naeuz: Baengzyoux cingjhek nanzdauh lij hawj gou ok ngaenz? Caen dwg mehmbwk byoem raez raen noix lo.

Daegsanh rieg buhvaq ndei, roiroi gyauej, ciuqciueq gingq, doq okdou bae ra baengzyoux lo.

Daegvaz caeueq Daegfuz caeux couh ndwn youq bakdou bouqlaeuj caj de, geij boux doxraen, doxgot doxhoh, haemhneix, cien coenz hauq fanh coenz vah daenz ndaw hoz yaek doxlwnh caez bae.

Haeuj congz naengh ndei le, sam ndaek baengzyoux noix mbouj ndaej cam neix cam haenx, doxcam 10 lai bi neix gak boux baenzlawz gvaq. Baez cam Daegsanh cij rox, song boux baengzyoux de dwg youq rog guh seng’ eiq gaicawx hung, daehngaenz raek youq gwnz saivaq bongzbodbod. Seizneix gij saedcej songde gvaq ndaej ndei le, roxdaengz youxcingz beij ngaenzcienz naekna, ndigah dauq ranzcoj byaijbyaij yawjngonz baengzyoux geq, caemhcaiq cimhra miz gijmaz hanghmoeg baenz roengzbonj. Lij heuh Daegsanh bang songde dawz cawjeiq dem.

Cenj bae cenj dauq vuenh laeuj geij boi gwn geij amq byaek le, aenvih dungx byouq gwn laeuj mbouj miz maz demh dungx, Daegvaz caeueq Daegfuz naj nding rwz oq miz di daraiz lo, yawj daeuj songde miz di fiz bw, lij heuh naeuz yaek bae goding ciengq go guh’ angq yaep ndeu dem, Daegsanh couh hemq fuzvuyenz daeuj gietsoq.

Daegvaz fwt ndwn hwnqdauej, gaenq dwg saemxaemx saxsax, yiengq Daegsanh baetbaet fwngz naeuz: “Mwngz gaej guenj, gou ok ngaenz.” De ngamq gangj sat, Daegfuz youh ndwn hwnjdauej naeuz: “Sou gaej ceng, baezneix dwg gou cingjhek, yawz hawj

siujsoz diuj

Cingjhek

请 客

□ Lingz Siuyangh/凌秀香

sou ok ngaenz? Gou ok, gou ok.”

Daegfuz song fwngz ragdawz song fwngz Daegvaz mbouj hawj de mbon daeh, caih Daegvaz baenzlawz cukcak de cungj mbouj cuengq, songde got youq maenhdtw, boux mbouj nyiengh boux, sing gangj yied daeuj yied sang, lumjbaenz yaek doxceng doxmoeb nei, fuzvuyenz youq henz yawj dwk mwnhswd, mbouj rox baenzlawz guh, cij ndei cim coh Daegsanh.

“Dwg ha, songde boux rag boux, fwngz mbouj ndaejhoengq, dan lw fwngz gou ndaejhoengq lo. Hai, boux miz cienz, amqbak hung, vihliux donq haeuxcauez neix bae angjnaj, yienghneix roengzbae, goulau cingzngaih songde couh yaek goenq lo.” Daegsanh gag naemj gag ndeiri, doq cacoemj mbon daeh gietsoq. Songde yawjraen le lij gyajcang guh mbouj raen, ciuqyiengh lij doxgot doxrag, Daegsanh bibi gyauej naeuz: “Soq gou giet sat, sou couh gaej ceng lo.”

Daegvaz caeueq Daegfuz caemdingh roengzdauej naeuz: “Mbouj caeux di gangj!” Songde lij siengj rag Daegsanh bae ciengq go, Daegsanh naeuz: “Gou



gaenq yawj sou baenz seiq boux lo, ngoenzcog lij aeu bae hwnjban, mbouj miz seizgan buenx sou lo. ” Gangj sat doq laeglemx gag ndot bae ranz lo.

Daegsanh ma daengz ranz seiz, mehyah ninz ngamq ndiu gvaqdauej, cam naeuz: “Byawz cingjhek?”

Daegsanh dap naeuz: “Baengzyoux cingj.” “Yienghneix dawz cienz dauq hawj gou.” Mehyah naeuz.

Daegsanh youh naeuz: “Baengzyoux cingjhek gou ok ngaenz.” Mehyah riunyaen mbwnj bak naeuz: “Gou gangj mbouj loek ba? Haxbaenh Daeggangh dwk dienhvah daeuj naeuz , de gaenq ngaiz catsaij gvaq lo.”

Daegsanh dingq le bak aj linx iet, naeuz: “Okrog nanz, raen lai gvai lai, caen rox yienjheiq, gou vunzsoh bak noix, raen noix bamz lai, baezlaeng roxhit lo.”

gojsaeh iq

Vunzvangh Caeuq Vunzngawz

疯子 和 呆子

□ Lij Yeozging

Boux gyausou hag simleix ndeu bae ndaw hagdangz vunzvangh canhgvanh, liujgaij vunzvangh gwndaenj cingzgvang. Ngoenz ndeu roengzdauej, gamjdaengz bang vunzvangh neix guh saeh hawj vunz liuh mbouj daengz, suenq dwg da raen baez ndeu lo.

Siengj mbouj daengz yaek dauq danhvei seiz, fatyienh aen loekci deng vunz lid roengzdauej lo. “Itdingh dwg ndaek vunzvangh lawz daeuj luenh gauj lo.” Gyausou sim baenzneix siengj, doq doenghfwngz yaek cang aen loekbwhyungh hwnjbae.

Saehcingz mbouj ndei guh lo. Boux lid loekci gingqyienz lienz lozswh hix naeuj roengzdauej. Mbouj miz lozswh yawz an ndaej loekbwhyungh hwnjbae?

Gyausou mbouj miz saek di banhfap, mwh de gip ndaej mbouj rox baenzlawz guh seiz, boux vunzvangh ndeu lienz saet daiq diuq saet gvaqdauej lo, ndaw bak lij ciengq diuz go mbouj rox mingz ndeu. De raen gyausou yienghneix, couh dingz din roengzdauej cam dauqdaej fatseng gijmaz saeh.

Gyausou mbouj leixlangh de, danhseih doeklaeng lij dwg miz laexmauh dwk lwnh hawj bouxvunzvangh nyi.

Vunzvangh riuhaha naeuz: “Gou miz banhfap.” De daj moix aen loekci naeuj naed lozswh ndeu roengzdauej le, itheij dawz sam naed lozswh cang aen loekbwhyungh hwnjbae.

Gyausou doeksaet yat, ngeizvaeg dwk cam: “Mwngz yawz siengj ndaej ok aen banhfap neix daeuj?”

Vunzvangh riu naeuz: “Gou vunz baenzvangh, danhseih gou mbouj ngawz ne!”

Gizsaed, lajbiengz miz haujlai vunz, aenvih de fatyienh ndaw hong mizyinx, cungj biujyienh ok gij saeh caeueq vunzbiengz mbouj doengz ndeu okdauej, hawj vunz nanz lijgaij ndaej ok. Mbouj noix vunz youq mwh riusoemj vunzvangh seiz, gangj mbouj dingh vunz lij riusoemj de dwg vunzngawz dem bw.

Swcigih gietdingh: Gij gangcaiz Guengjsae gag cau haenx 85% yungh daeuj guh nungzyez caeueq hong gunghyez bang nungz. Daj bi 1973 haindu, daengx gih gyoebcomz 77 gya giyez 7 aen hangznieb bae camgya gij daveican cau dohlahgih, cienmonz cau gij sezbei boiqdauq swnghcanj hawj Liujcouh Dohlahgihcangj caeueq Yilinz、Namzningz Soujfuz Dohlahgihcangj. Veiz Gozcingh lai baez bae daengz gij cangj neix guh diucaz ngeixyaeng, dazyinx guhhong. Namzningz Soujfuz Dohlahgihcangj engqgya dwg aen giyez de ciengz bae ndeu. Bi 1974 ndwen 2 ngoenz 16, Gyangh Cingh caeueq bang mageq de ciq “bae Linz bae Gungj” guh yukyon, mbangj dieg mbangj danvih youh dauqcungz okyienh “dikhai dangjvej nauh gwzming”、dauqcungz baek mbawgeiz baijbied、cujciz lenzlozcan daengj miuzdauez seiz, Veiz Gozcingh lij youq gizneix caeueq vunzzhong naengh

roengzdauej damz gvaq, gibseiz sienmingz dwk biujdaz le swcigih dangjvej gvendaengz “bae Linz bae Gungj” itdingh aeu youq dangjvej doengjit lingjdauj lajde, genhciz seizhoengq guh gwzming aen daidu neix hawj daengx gih, dwkbaih le gij yaemmaeuz “Seiq Vunz Bang” siengj caiq lingh baez gauj luenh Guengjsae haenx.

Vihliux gyagiengz lingjdauj nungzyez gihgaiva, swcigih cienmonz laebbaenz le aen lingjdauj siujcuj daeuj guenj hangh hong neix, gak

digih、gak yienh cungj laebbaenz le gij gihgou guenjleix nungzyez caeueq gunglien dinfwngz nungzgih、doi-gvangq ngeixyaeng gohyoz、gunghawj doxgaiq、coih hongdawz、gamduk ancienz daengj fuzvu diji. Nungzgih bumwnz ciengzseiz guh aenyienh nungzgih byaujyenj, Veiz Gozcingh lai baez bae ngon, daezok yigen, guh mbangj sonyinx. Bi 1975, Guengjsae cau ok nungzgih gaenq haindu baenz gveihmoz, soujfuz dohlahgih bi cau ok 1.1 fanh daiz, dohlahgih cunghingz bi cau ok 3065 daiz,

nungzyungh heiqci bi cau ok 800 gyaq, caizyouzgih bi cau ok 48.98 fanh maxlig, vih Guengjsae gvaqlaeng saedyienh nungzyez gihgaiva guh baenz le aen goekdae haemq ndei ndeu. Bi 1978 ndwen 1, baez Daengx Guek Nungzyez Gihgaiva Vei yi laeb miz song aen denjhingz, aen ndeu dwg Sanhdungh, lingh aen dwg Guengjsae. Seizde 《Yinzminz Yizbau》daeng miz selun, cix daezok youq daengx guek guh baez doxdax gwzming aen cangyi aeu “namz beij Guengjsae, baek gyaep Sanhdungh” he. (caengz sat)

Veiz Gozcingh Sangcieng Cawj-guenj Guengjsae Ngeihcib Bi

韦 国 清 上 将 主 政 广 西 二 十 年

□ Hoz Saubangj sij Cinz Siengzcouh Liuz Gingliuj Cinz Siengzgen hoiz